

東坡先生全集卷之七十四

詞

水龍吟四首一

古來雲海茫茫蓬山絳闕知何處人間自有赤城
居士龍蟠鳳舉清淨無爲坐忘遺照八篇竒語向
玉霄東望蓬萊晝靄有雲駕驂風馭行盡九州
四海笑紛紛落花飛絮臨江一見謫仙風采無言
心許八表神遊浩然相對酒酣箕踞待垂天賦就
騎鯨路穩約相將去

二

詠笛材公舊序云時太守閻丘公顯已致仕居姑蘇後房懿卿者甚有才色因賦此

詞一云贈
趙晦之

楚山修竹如雲異材秀出千林表
龍鬚半剪鳳膺微漲玉肌勻
繞木落淮南雨晴雲夢月明風裊自
中郎不見桓伊去後知辜負秋多少
聞道嶺南太守後堂深綠珠嬌小
綺窻學弄梁州初遍霓裳未了
嚼徵含宮泛商流羽一聲雲杪爲使君洗盡
蠻風瘴雨作霜天曉

三

次韻章質夫楊花詞

似花還似非花也無人惜從教墜
拋家傍路思量却是無情有思
縈損柔腸困酣嬌眼欲開還閉夢

隨風萬里尋郎去處又還被鶯呼起
不恨此花飛盡恨西園落紅難綴
曉來雨過遺蹤何在一池萍碎
春色三分二分塵土一分流水
細看來不是楊花點點是離人淚

四

公舊註云閭丘大夫孝直公顯嘗守黃州作栖霞樓爲野中騰絕元豐五年予謫居黃正月十七日夢扁舟渡江中流回望樓中歌樂雜作舟中人言公顯方會客也覺而異之乃作此詞公顯時已致仕在蘇州

小舟橫截春江臥看翠壁紅樓起雲間笑語使君
高會佳人半醉危柱哀絲艷歌餘響遶雲縈水念
故人老大風流未減獨回首烟波裏推枕惘然

不見但空江月明千里五湖聞道扁舟歸去仍携
西子雲夢南州武昌南岸昔游應記料多情夢裡
端來見我也參差是

滿庭芳六首一

公舊序云元豐七年四月一日余將自黃移汝留別雪堂

鄰里二三君子會李仲覽
自江東來別遂書以遺之

歸去來兮吾歸何處萬里家在岷峨百年強半來
日苦無多坐見黃州載閨兒童盡楚語吳歌山中
友雞豚社飲相勸老東坡云何當此際人生底
事來往如梭待閒看秋風洛水清波好在堂前細
柳應念我莫剪柔柯仍傳語江南父老時與睬漁

簞

二公自序云余居黃五年將赴臨汝作滿庭芳一篇別黃州既至南都蒙恩放歸陽羨

復作一篇

歸去來兮清溪無底上有千仞嵯峩畫樓東畔天
遠夕陽多老去君恩未報空回首彈鋏悲歌船頭
轉長風萬里歸馬駐平坡無何何處是銀潢盡
處天女停梭問人間何事久戲風波顧問同來穉
子應爛汝腰下長柯青衫破羣仙笑我千縷挂烟
簞

三佳人

東坡全集卷之七十四
香鑿雕盤寒生冰筋畫堂別是風光主人情重開
宴出紅粧膩玉圓搓素頸藕絲嫩新織仙裳雙歌
罷虛欄轉月餘韻尚悠颺 人間何處有司空見
慣應謂尋常坐中有狂客惱亂愁腸報道金釵墜
也十指露春筍纖長親曾見全勝宋玉想像賦高
唐

四

蝸角虛名蠅頭微利筭來着甚乾忙事皆前定誰
弱又誰強且趑趄閒身未老儘放我些子疎狂百年
裏渾教是醉三萬六千場 思量能幾許憂愁風

雨一半相妨又何須抵死說短論長幸對清風皓
月苔茵展雲幙高張江南好千鍾美酒一曲滿庭
芳

五

公舊序云有王長官者棄官三十三年黃
人謂之王先生因送陳慥來過余因賦

三十三年今誰存者筭只君與長江凜然蒼檜霜
榦苦難雙聞道司州古縣雲溪上竹塢松窻江南
岸不因送子寧肯過吾邦 縱縱疎雨過風林舞
破烟葢雲幢願持此邀君一飲空缸居士先生老
矣真夢裡相對殘缸歌舞斷行人未起船鼓已逢
逢

夏均全集卷之十一
六楊元素本事曲集云子瞻始與劉仲達往來於眉山後相逢於泗上久留郡中遊南山話舊

山話舊
而作

三十三年漂流江海萬里烟浪雲帆故人驚怪憔悴老青衫我自疎狂異趣君何事奔走塵凡流年盡窮途坐守船尾凍相銜
巉巉淮浦外層樓翠壁古寺空崑步攜手林間笑挽纖纖莫上孤峯盡處縈望眼雲海相攬家何在因君問我歸步遶松杉

水調歌頭五首一

快哉亭作

落日繡簾捲亭下水連空知君爲我新作窻戶濕

青紅長記平山堂上欹枕江南烟雨杳杳沒孤鴻
認得醉翁語山色有無中 一千頃都鏡淨倒碧
峯忽然浪起掀舞一葉白頭翁堪笑蘭臺公子未
解莊生天籟剛道有雌雄一點浩然氣千里快哉
風

二

公舊序云余去歲在東武作水調歌頭以
寄子由今年子由相從彭城百餘日過中
秋而去作曲以別余以其語過悲乃爲和
之其意以不早退爲戒以退而相從之樂
爲慰云耳

安石在東海從事髣驚秋中年親友難別絲竹緩
離愁一旦功成名遂準擬東還海道扶病入西州

雅志因軒冕遺恨寄滄洲

歲云暮須早計要褐

裘故鄉歸去千里佳處輒遲留我醉歌時君和醉
倒須君扶我惟酒可忘憂一任劉元德相對臥高
樓

三

丙辰中秋歡飲達旦大
醉作此篇兼懷子由

明月幾時有把酒問青天不知天上宮闕今夕是
何年我欲乘風歸去又恐瓊樓玉宇高處不勝寒
起舞弄清影何似在人間轉朱閣低綺戶照無
眠不應有恨何事長向別時圓人有悲歡離合月
有陰晴圓缺此事古難全但願人長久千里共嬋

娟

四

公舊序云歐陽文忠公嘗問余琴詩何者最善荅以退之穎師琴詩最善公曰此詩最奇麗然非聽琴乃聽琵琶也余深然之建安章質夫家善琵琶者乞爲歌詞余久不作特取退之詞稍加櫟括使就聲律以遺之

昵昵兒女語燈火夜微明
恩冤爾汝來去彈指淚
和聲忽變軒昂勇士一鼓填然作氣千里不流行
回首暮雲遠飛絮攪青冥
衆禽裏真彩鳳獨不
鳴躋攀寸步千險一落百尋輕煩子指間風雨置
我腸中冰炭起坐不能平
推手從歸去無淚與君
傾

五

子由徐州中秋作

離別一何久七度過中秋去年東武今夕明月不
勝愁豈意彭城山下同泛清河古汴船上載涼州
鼓吹助清賞鴻鴈起汀洲坐中客翠羽被紫綺
裘素娥無賴西去曾不爲人留今夜清樽對客明
夜孤帆水驛依舊照離憂但恐同王粲相對永登
樓

滿江紅五首一

楊元素本事曲集董義夫名
鉞自倅漕得罪歸鄱陽遇東

坡於齊安怪其豐暇自得曰吾再娶柳氏
三日而去官吾固不戚戚而憂柳氏不能
忘懷於進退也已而欣然同憂患如處富
貴吾是以益安焉乃令家僮歌其所作滿

江紅東坡嗟
歎之次其韻

憂喜相尋風雨過一江春綠巫峽夢至今空有亂
山屏簇何似伯鸞攜德耀簞瓢未足清歡足漸粲
然光彩照階庭生蘭玉幽夢裡傳心曲腸斷處
憑他續文君壻知否笑君卑辱君不見周南歌漢
廣天教夫子休喬木便相將左手抱琴書雲間宿

二

江漢西來高樓下蒲萄深碧猶自帶岷峨雲浪錦
江春色君是南山遺愛守我爲劍外思歸客對此
間風物豈無情殷懃說江表傳君休讀狂處士

真堪惜空洲對鸚鵡葦花蕭瑟獨笑書生爭底事
曹公黃祖俱飄忽願使君還賦謫仙詩追黃鶴

三 東武會流杯亭

東武南城新堤固漣漪初溢隱隱遍長林高阜臥
紅堆碧枝上殘花吹盡也與君更向江頭覓問向
前猶有幾多春三之一 官裏事何時畢風雨外
無多日相將泛曲水滿城爭出君不見蘭亭修禊
事當時座上皆豪逸到如今修竹滿山陰空陳迹

四 懷子由作

清潁東流愁目斷孤帆明滅宦遊處青山白浪萬

里重疊辜負當年林下意對牀夜雨聽蕭瑟恨此
生長向別離中添華髮一樽酒黃河側無限事
從頭說相看恍如許多年月衣上舊痕餘苦淚眉
間喜氣添黃色便與君池上覓殘春花如雪

五 正月十三日送姜安國還朝

天豈無情天也解多情留客春向暖朝來底事尚
飄輕雪君過春來紆組綬我應歸去耽泉石恐異
時盃酒忽相思雲山隔浮世事俱難必人縱健
頭應白何辭更一醉此歡難覓欲向佳人訴離恨
淚珠先已凝雙睫但莫遣新燕却來時音書絕

歸朝歌

公嘗有詩與蘇伯固其序曰昔有九江與蘇伯固唱和其畧曰我夢扁舟

浮震澤雪浪橫江千頃白覺來滿眼是廬山倚天無數開青壁蓋實夢也然公詩復云扁舟震澤定何時

滿眼廬山覺又非

我夢扁舟浮震澤雪浪搖空千頃白覺來滿眼是
廬山倚天無數開青壁此生長接浙與君同是江
南客夢中遊覺來清賞同作飛梭擲明日西風
還掛席唱我新詞淚沾臆靈均去後楚山空灃陽
蘭芷無顏色君才如夢得武陵更在西南極竹枝
詞莫搖新唱誰謂古今隔

念奴嬌二首一

赤壁懷古

大江東去浪淘盡千古風流人物故壘西邊人道
是三國周郎赤壁亂石穿空驚濤拍岸捲起千堆
雪江山如畫一時多少豪傑遙想公瑾當年小
喬初嫁了雄姿英發羽扇綸巾談笑間強虜一作檣艣
灰飛烟滅故國神遊多情應笑我早生華髮人間
如夢一樽還酹江月

二 中秋

憑高眺遠見長空萬里雲無留迹桂魄飛來光射
處冷浸一天秋碧玉宇瓊樓乘鸞來去人在清涼
國江山如畫望中烟樹歷歷我醉拍手狂歌舉